



DIKELUARKAN OLEH JABATAN MUFTI PERLIS

**MEMELIHARA ALAM SEKITAR SUATU
TUNTUTAN DALAM ISLAM**

(TEKS KHUTBAH JUMAAT 28 OKTOBER 2022)

**MEMELIHARA ALAM SEKITAR SUATU TUNTUTAN
DALAM ISLAM**

الْحَمْدُ لِلّٰهِ نَحْمَدُهُ وَنَسْتَعِينُهُ وَنَسْتَغْفِرُهُ وَنَعُوذُ بِاللّٰهِ مِنْ شُرُورِ أَنفُسِنَا وَمِنْ سَيِّئَاتِ أَعْمَالِنَا، مَنْ يَهْدِهِ اللّٰهُ فَلَا مُضِلٌّ لَهُ وَمَنْ يُضْلِلُهُ فَلَا هَادِي لَهُ، أَشْهُدُ أَنَّ لَّا إِلٰهَ إِلَّا اللّٰهُ وَحْدَهُ لَا شَرِيكَ لَهُ، وَأَشْهُدُ أَنَّ مُحَمَّداً عَبْدُهُ وَرَسُولُهُ. اللّٰهُمَّ صَلِّ وَسَلِّمْ عَلَى مُحَمَّدٍ وَعَلَى آلِهِ وَاصْحَابِهِ وَمَنْ تَبَعَهُمْ بِإِحْسَانٍ إِلَى يَوْمِ الدِّينِ. يَا أَيُّهَا الَّذِينَ آمَنُوا اتَّقُوا اللّٰهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

أَمَّا بَعْدُ، فَإِنَّ أَصْدَقَ الْحَدِيثِ كِتَابُ اللّٰهِ، وَخَيْرُ الْهُدَىٰ هُدْيُ مُحَمَّدٍ صَلَّى اللّٰهُ عَلَيْهِ وَسَلَّمَ، وَشَرُّ الْأُمُورِ مُحْدَثُّهَا، وَكُلُّ مُحْدَثَةٍ بِدُعَةٍ، وَكُلُّ بِدُعَةٍ ضَلَالٌ، وَكُلُّ ضَلَالٍ فِي النَّارِ.

Sidang Jumaat Yang Dikasihi Allah Sekalian,

Marilah kita sama-sama mempertingkatkan keimanan dan ketakwaan kepada Allah SWT dengan bersungguh-sungguh melaksanakan segala suruhan-Nya dan menjauhi larangan-Nya. Mudah-mudahan dengan keimanan dan ketakwaan, kita beroleh rahmat dan keredhaan hidup di dunia dan di akhirat. Khutbah pada hari ini akan membicarakan mengenai tajuk; "**MEMELIHARA ALAM SEKITAR SUATU TUNTUTAN DALAM ISLAM**".

Sidang Jumaat Yang Dirahmati Allah Sekalian,

Kita hendaklah memahami dan insaf, bahawa bencana alam dan kerosakkan di atas muka bumi ini boleh berlaku pada bila-bila masa sahaja. Bencana alam dan kerosakkan yang berlaku itu disebabkan oleh apa yang telah dilakukan oleh manusia itu sendiri. Allah ﷺ hendak memberi balasan kepada mereka di atas segala perbuatan buruk yang telah mereka lakukan, sepetimana Allah ﷺ berfirman dalam surah ar-Rum ayat 41:

ظَهَرَ الْفَسَادُ فِي الْبَرِّ وَالْبَحْرِ بِمَا كَسَبَتْ أَيْدِي النَّاسِ لِيُذِيقَهُمْ بَعْضَ الَّذِي عَمِلُوا لَعَلَّهُمْ

يَرْجِعُونَ

Maksudnya: “*Telah timbul berbagai kerosakan dan bala bencana di darat dan di laut dengan sebab apa yang telah dilakukan oleh tangan manusia; (timbulnya yang demikian) kerana Allah hendak merasakan mereka sebahagian dari balasan perbuatan-perbuatan buruk yang mereka telah lakukan, supaya mereka kembali (insaf dan bertaubat)*”.

Selain itu, diantara beberapa perbuatan dosa yang boleh menyebabkan kerosakan dan mendapat laknat dari manusia ialah seperti mana Rasulullah ﷺ telah bersabda:

إِتَّقُوا اللَّعَانِينَ قَالُوا وَمَا اللَّعَانَانِ يَا رَسُولَ اللَّهِ قَالَ الَّذِي يَتَخَلَّ فِي طَرِيقِ النَّاسِ أَوْ فِي ظِلِّهِمْ.

Ertinya: “*Takutlah kamu kepada dua perkara yang (menyebabkan kamu) dilaknat”. Sahabat bertanya: “Apakah dia dua perkara tersebut?”. Telah bersabda baginda (Rasulullah SAW): “Orang yang membuang air besar di laluan orang ramai dan di tempat teduh mereka”.*(Hadis Riwayat Muslim).

Sidang Jumaat Yang Dikasihi Allah,

Terdapat beberapa surah dan ayat di dalam Al-Quran yang menceritakan tentang tamadun dan umatnya yang telah dimusnahkan oleh Allah ﷺ melalui bencana alam disebabkan oleh keingkaran mereka terhadap seruan para rasul supaya mereka mentauhidkan Allah.

Antaranya, kaum Nabi Nuh AS telah dimusnahkan dengan banjir yang paling dahsyat, kaum Nabi Luth AS telah dibinasakan dengan diturunkan azab siksaan dari langit, kaum 'Aad telah dimusnahkan dengan angin ribut berhujan batu, kaum Nabi Musa AS seperti Qarun telah dibenam ke dalam perut bumi, Fir'aun bersama bala tentera telah ditenggelamkan didalam laut dan kaum Nabi Soleh AS yakni Samud telah dibinasakan dengan letusan suara yang menggemparkan bumi.

Jelasnya, bencana alam yang memusnahkan kaum-kaum para Rasul tersebut adalah kerana hukuman Allah swt atas kekufuran, kemungkaran dan disebabkan oleh dosa-dosa yang telah mereka lakukan, seperti mana Allah SWT berfirman dalam surah Al-'Ankabuut ayat 40:

فَكُلًا أَخْدَنَا بِذَنْبِهِ فَمِنْهُمْ مَنْ أَرْسَلَنَا عَلَيْهِ حَاصِبًا وَمِنْهُمْ مَنْ أَخْذَتْهُ الصَّيْحَةُ وَمِنْهُمْ
 مَنْ خَسَفْنَا بِهِ الْأَرْضَ وَمِنْهُمْ مَنْ أَغْرَقْنَا وَمَا كَانَ اللَّهُ لِيَظْلِمَهُمْ وَلَكِنْ كَانُوا
اَنفُسُهُمْ يَظْلِمُونَ

Maksudnya: “Maka masing-masing kami binasakan dengan sebab dosanya, iaitu di antaranya ada yang kami hantarkan angin ribut menghujaninya dengan batu; dan ada yang dibinasakan dengan letusan suara yang menggemparkan bumi; dan ada yang kami timbuskan dia di bumi; dan ada pula yang kami tenggelamkan di laut. dan (ingatlah) Allah tidak sekali-kali menganiaya mereka, akan tetapi merekalah yang menganiaya diri sendiri”.

Peringatan ayat Allah SWT tersebut hendaknya menjadi pengajaran bagi kita, bahawa akibat daripada kekufuran, kesyirikan dan perbuatan maksiat yang dilakukan, akan menjadi penyebab datangnya bala bencana disebabkan kemurkaan Allah ﷺ.

Sidang Jumaat Yang Dikasihi Sekalian,

Ada juga beberapa perbuatan yang dilakukan tanpa kita disedari yang boleh mengundang kemurkaan dari Allah SWT dan mengundang kerosakan di atas muka bumi ini. Antara perkara yang wajib dielakkan supaya tidak berlaku kerosakan dimuka bumi ini ialah;

Pertama; Jangan Membuang sampah atau sisa pepejal di merata tempat, seperti di tepi jalan, di dalam sungai, parit, longkang dan sebagainya yang boleh menyebabkan aliran air tersekat dan terjadinya banjir kilat ketika hujan turun.

Kedua; Jangan membakar sampah sarap dan hutan secara terbuka. Mengeluarkan asap yang terlalu banyak dari kenderaan dan kilang-kilang juga boleh menyebabkan terjadinya bencana alam seperti jerebu.

Ketiga; Jangan membuang sisa kimia dari kilang ke dalam sungai, tasik, lombong dan laut yang boleh menyebabkan keracunan air dan kematian ikan-ikan yang terdapat di dalamnya.

Keempat; Jangan menebang pokok-pokok yang tak sepatutnya ditebang sama ada pokok-pokok yang terdapat di tanah rendah atau di tanah tinggi, seperti pokok-pokok yang berada di tanah rata di bukit-bukau dan di gunung-ganang. Rasulullah ﷺ bersabda;

مَنْ قَطَعَ سِدْرَةً صَوَّبَ اللَّهُ رَأْسَهُ فِي النَّارِ

Ertinya: “**Barangsiapa yang menebang (pokok) sidrah, maka Allah akan menundukkan kepalanya di dalam neraka**”.

Imam Abu Daud ditanya tentang makna hadis ini, lalu dia berkata; “**Artinya, barangsiapa yang menebang pokok sidrah yang biasa dijadikan tempat berteduh orang yang bermusafir dan juga binatang-binatang (di padang pasir), dengan sengaja (tanpa alasan yang jelas) dan secara aniaya, Allah akan menundukkan kepalanya di dalam neraka.**”

Sidang Jumaat Yang Dihormati Sekalian,

Di negeri Perlis ini sendiri masih terdapat tempat yang jelas kotor dan tercemar kebersihan alam sekitarnya, disebabkan oleh pembuangan sampah dan plastik yang tidak mengikuti akhlak yang diajar oleh Islam. Perbuatan mengotorkan dan merosakkan alam ini adalah salah dan berdosa.

Sungai dan laut penuh dengan sampah sarap dan plastik yang memudharatkan kehidupan lain, para pelaku perbuatan ini telah melanggar prinsip dan akhlak Islam, seperti yang ditegaskan dalam Al-Quran dan Hadis.

Sebagai umat Islam, kita hendaklah mengetahui dan sedar bahawa perbuatan mencemarkan kebersihan negeri adalah suatu dosa, ini berdasarkan beberapa sebab, antaranya ialah;

Yang Pertama; Membuang sampah di merata tempat adalah salah satu perbuatan melanggar arahan dan larangan pemerintah, maka ianya adalah suatu dosa, ini kerana Islam telah mewajibkan umatnya supaya mentaati arahan pemerintah dalam semua urusan, selagi mana arahannya tidak menyalahi syarak.

Yang Kedua; Perbuatan tersebut juga boleh menyusahkan orang ramai dan menyakitkan mata yang memandang, serta boleh menyebabkan terjadinya penuluran penyakit dan menjelaskan kesihatan kita, maka perlaku tersebut telah menanggung dosa yang besar.

Yang Ketiga; Jika berlaku pencemaran alam sekitar dan dipenuhi sampah sarap maka iaanya boleh merosakkan imej negeri ini dan menjatuhkan maruah umat Islam dikaca mata orang yang bukan Islam.

Sidang Jumaat Yang Dihormati Sekalian,

Mesyuarat Jawatankuasa Fatwa Negeri Perlis Kali Ke-20 dan 21/2016 yang bersidang pada 18-19 Februari 2016 bersamaan 9-10 Jamadil Awwal 1437H telah memutuskan seperti berikut:

Islam adalah agama yang memelihara kemaslahatan kehidupan manusia dan alam. Tujuan syariah itu sendiri juga menegakkan maslahah dan mengelakkan mafsaadah. Maka, Jawatankuasa Fatwa Negeri Perlis dengan ini menyatakan:

Pertama; Apa-apa perbuatan yang mencemarkan alam sekitar dan memberi kesan kemudharatan fizikal secara langsung kepada manusia, haiwan dan tumbuh-tumbuhan adalah haram, kecuali jika terdapat maslahah muktabar yang lebih besar atau mengelak mafsaadah yang nyata.

Kedua; Setiap muslim wajib mengelakkan diri daripada melakukan apa-apa sahaja aktiviti dan perbuatan yang boleh memberi kesan kepada pencemaran alam sekitar yang merosakkan kehidupan dan mengganggu secara langsung ekosistem. Sebarang usaha bagi menjaga alam sekitar adalah perbuatan yang digalakkan oleh agama dan merupakan amalan soleh.

Untuk mengakhiri khutbah pada minggu ini, khatib ingin menyeru kepada sidang jemaah sekalian, marilah sama-sama kita mengurus bumi Allah ﷺ ini dengan rasa bertanggungjawab, beramanah, jujur bagi mengelak berlakunya kesan buruk terhadap kehidupan kita semua. Ingatlah anugerah Allah ﷺ ini akan menjadi rahmat kepada kita dan dalam masa yang sama ia juga boleh menjadi bala bencana serta azab yang amat pedih kepada kita semua. Allah SWT berfirman dalam surah Al-qasas, ayat 83-84;

تِلْكَ الَّذِي أَرْأَى لَا يَرِيدُونَ عُلُوًّا فِي الْأَرْضِ وَلَا فَسَادًا وَالْعَدْقَبَةُ لِلْمُتَّقِينَ
 ٨٦
 مَنْ جَاءَ بِالْحَسَنَةِ فَلَهُ خَيْرٌ مِّنْهَا وَمَنْ جَاءَ بِالسَّيِّئَةِ فَلَا تُحْزِنْ إِلَّا مَا
 كَانُوا يَعْمَلُونَ
 ٨٧

Maksudnya; “Negeri akhirat itu, kami jadikan untuk orang-orang yang tidak ingin menyombongkan diri dan berbuat kerusakan di (muka) bumi. Dan kesudahan (yang baik) itu adalah bagi orang-orang yang bertakwa. Barangsiapa yang datang dengan (membawa) kebaikan, maka baginya (pahala) yang lebih baik daripada kebaikannya itu; dan barangsiapa yang datang dengan (membawa) kejahatan, maka tidaklah diberi pembalasan kepada orang-orang yang telah mengerjakan kejahatan itu, melainkan (seimbang) dengan apa yang dahulu mereka kerjakan”.

بَارَكَ اللَّهُ لِيْ وَلَكُمْ فِي الْقُرْآنِ الْعَظِيمِ وَنَفْعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
 الْحَكِيمِ

KHUTBAH KEDUA

الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَمَنْ يَجْعَلْ لَهُ عِوْجَانَا. اللَّهُمَّ صَلِّ وَسَلِّمْ وَبَارِكْ عَلَى مُحَمَّدٍ وَعَلَى آلِهِ وَصَحْبِهِ أَجْمَعِينَ، أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat Yang Dikasihi Sekalian,

Sifat malas merupakan salah satu penghalang bagi manusia untuk berjaya sama ada di dunia mahupun akhirat. Oleh kerana itu, Nabi saw telah mengajarkan kepada kita semua doa supaya Allah swt melindungi diri kita semua dari sifat malas, sepetimana sebuah hadis yang diriwayatkan oleh al-Imam al-Bukhari bahawa Nabi saw selalu membaca doa ini :

اللَّهُمَّ إِنِّي أَعُوذُ بِكَ مِنْ الْعَجْزِ وَالْكَسَلِ وَالْجُنُبِ وَالْفَحْشَاءِ وَأَعُوذُ بِكَ مِنْ عَذَابِ
الْقَبِيرِ وَأَعُوذُ بِكَ مِنْ فِتْنَةِ الْمَحْيَا وَالْمَمَاتِ

Maksudnya: “(Ya Allah, aku berlindung kepada-Mu dari kelemahan, kemalasan, pengecut, kekikiran dan keburukan pada hari tua. Dan aku berlindung kepada-Mu dari seksa kubur dan berlindung kepada-Mu dari fitnah kehidupan dan kematian)”.

Justeru itu, marilah sama-sama kita memperbanyakkan membaca doa tersebut, sepetimana yang diajarkan oleh Nabi saw ini, supaya diri kita dijauhi dengan sifat malas dan sifat buruk yang lain. semoga diri kita terus bersemangat untuk terus melakukan kebaikan.

Sidang Jumaat Yang Dihormati Sekalian,

Sesungguhnya, Allah SWT berfirman dalam surah Al-Ahzab ayat 56:

إِنَّ اللَّهَ وَمَلَائِكَتَهُ يُصَلِّوْنَ عَلَى النَّبِيِّ يَتَأَمَّلُهَا الَّذِينَ ءامَنُوا صَلَوْا عَلَيْهِ وَسَلَّمُوا تَسْلِيمًا



Maksudnya: Sesungguhnya Allah dan para malaikat berselawat ke atas Nabi, maka wahai orang-orang yang beriman hendaklah kamu berselawat dan salam ke atas Nabi.

Nabi SAW bersabda dalam hadis yang sahih, daripada Anas Bin Malik RA;

مَنْ صَلَّى عَلَيَّ وَاحِدَةً صَلَّى اللَّهُ عَلَيْهِ عَشْرًا، وَحَطَّ عَنْهُ عَشْرَ حَطَّيَّاتٍ

Yang bermaksud; “Barangsiaapa berselawat ke atas aku satu kali, maka Allah membalaunya (dengan merahmatinya dan Allah memberi ganjaran pahala kepadanya sebanyak) 10 kali

dan (Allah) menghapuskan dosa-dosanya".(Hadis Riwayat Al-Bukhari dalam Al-Adabulmufrad)

اللّٰهُمَّ صَلِّ عَلٰى مُحَمَّدٍ وَعَلٰى آلِ مُحَمَّدٍ كَمَا صَلَّيْتَ عَلٰى إِبْرَاهِيمَ وَعَلٰى آلِ إِبْرَاهِيمَ
وَبَارِكْ عَلٰى مُحَمَّدٍ وَعَلٰى آلِ مُحَمَّدٍ كَمَا بَارَكْتَ عَلٰى إِبْرَاهِيمَ وَعَلٰى آلِ إِبْرَاهِيمَ فِي
الْعَالَمِينَ إِنَّكَ حَمِيدٌ مَجِيدٌ. اللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ بُحْيِيْ الدَّعَوَاتِ وَقَاضِي
الْحَاجَاتِ.

Ya Allah! Ampunilah seluruh kaum muslimin sama ada yang hidup ataupun yang telah mati. Ya Allah! Berikan petunjuk hidayah serta rahmatMu kepada kami sekalian hamba-hambaMu dan kepada pemimpin kami terutamanya Raja pemerintah Negeri Perlis Tuanku Syed Sirajuddin Ibni Al-Marhum Tuanku Syed Putra Jamalullail dan Raja Muda Perlis Tuanku Syed Faizuddin Putra Ibni Tuanku Syed Sirajuddin Jamalullail serta kaum kerabat Baginda, supaya sentiasa beramal dengan kitabMu dan sunnah nabiMu Muhammad SAW, dan Engkau lanjutkanlah usia baginda berdua dalam keadaan selamat, sihat sejahtera dan semoga dengan kesihatan yang baik yang telah Engkau kurniakan kepada baginda berdua, terlaksanalah pemerintahan yang adil lagi diredhai olehMu.

Ya Rahman, Ya Rahim! Kami memohon kepadaMu dengan segala kerendahan diri sebagai hambaMu, Engkau indahkanlah akhlak kami, Engkau perbaikilah pergaulan antara kami. Engkau jadikanlah kami umat Islam yang bermentaliti kelas pertama dalam tindakan. Engkau peliharalah kami dari penyakit lemah, malas, berfikiran dangkal dan buruk budi pekerti.

Ya Allah! Engkau jauhkanlah kami dari bala dan kerosakan. Engkau tambahkanlah nikmatmu kepada kami. Engkau berikanlah kepada kami kebahagiaan hidup di dunia dan di hari akhirat.

رَبَّنَا آتَنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. إِنَّ اللَّهَ يَأْمُرُ بِالْعَدْلِ
وَالْإِحْسَانِ وَإِيتَاءِ ذِي الْقُرْبَى وَيَنْهَا عَنِ الْفَحْشَاءِ وَالْمُنْكَرِ وَالْبَغْيِ، يَعِظُّكُمْ لَعَلَّكُمْ
تَذَكَّرُونَ.